

Sultan: "Dok... tok se nyanyi. Payoh"

Malaysiakini.com

April 7, 2010

Buat pertama kali setelah hampir setahun gering, Sultan Kelantan Sultan Ismail Petra berkenan bertemu rakyat, dalam keadaan baginda yang seringkali tersenyum dan semakin sihat, pada satu majlis di Istana Mahkota di Kota Bharu hari ini.

Sultan Ismail, yang berpakaian kemeja hitam bercorak bunga putih, berkenan untuk bertemu rakyat jelata pada 5.20 petang dengan menaiki kerusi roda dan diiringi Raja Perempuan Kelantan Tengku Anis Tengku Abdul Hamid pada majlis meraikan 150 anak yatim Taman Sabariah dan pemberian sumbangan zakat.

Baginda turut berbual dengan kenalan lama, malahan Tengku Anis pula sempat berseloroh dengan bertanya sama ada baginda ingin menyanyi.

Sambil tersenyum baginda bertitah: "Dok... tok se nyanyi (Tidak... tidak mahu menyanyi). Payoh (susah)."

Biarpun suara baginda serak dan agak sukar untuk melafazkan kata-kata namun senyuman yang sentiasa terukir di bibir membuktikan keadaan kesihatan baginda yang semakin pulih.

Turut hadir pada majlis itu adalah Tengku Temenggong Kelantan, Tengku Muhammad Fakhry Petra dan bekas pengerusi Majlis Perajaan Negeri, Tengku Abdul Aziz Tengku Hamzah di samping bekas setiausaha kerajaan negeri, Datuk Wan Hashim Wan Daud yang juga 'setiausaha sulit' baginda.

Sultan Ismail Petra yang gering sejak Mei tahun lalu, kembali ke tanah air pada 4 Mac lalu setelah mendapat rawatan susulan di Hospital Mount Elizabeth, Singapura.

Semalam, baginda dibawa bersiar-siar di sekitar bandar ini dengan menaiki kereta Bentley yang dipandu oleh anakanda baginda, Tengku Temenggong Kelantan Tengku Muhammad Fakhry Petra.

Sementara itu, Rosli Ngah, iaitu pakar fisioterapi dan jurupulih di Hospital Raja Perempuan Zainab II, berkata keadaan baginda kini semakin pulih.

Ketika berucap pada majlis itu, beliau berkata pihaknya menjalankan rawatan muzik terapi untuk membolehkan baginda bertitah semula.

"Tuanku dapat hafal satu lagu... burung kakak tua. Alhamdulillah percakapan tuanku kini semakin pulih," katanya.

Beliau berkata Sultan Ismail Petra turut menjalani terapi cara kerja dan fisioterapi tiga kali sehari.

Selain rawatan, kakitangan Istana dan Raja Perempuan sentiasa mengerjakan solat hajat serta bacaan Yasin setiap hari sejak baginda dirawat di Singapura lagi.

Beliau berkata rawatan terkini ialah membawa baginda bersiar-siar keluar dari istana sebagai 'environmental stimulation'.

Katanya keadaan mata baginda juga masih elok setelah diperiksa semalam dan cuma

memerlukan cermin mata baru akibat rabun dekat.

Majlis diakhiri dengan nyanyian selamat hari jadi dan upacara memotong kek yang dilakukan oleh Tengku Muhammad Fakhry Petra dengan disaksikan oleh Sultan dan Raja Perempuan Kelantan.

- Bernama

Copyright © 1999-2007 Mkini Dotcom Sdn. Bhd.
Source : <http://www.malaysiakini.com/news/128571>